

Predstavnički dom PFBiH nije podržao inicijativu zastupnika Jasmina Kadića (SDP) prema Vijeću ministara Bosne i Hercegovine, da se odmah pokrene pitanje ostvarivanja prava na dio proizvedene električne energije iz HE Zvornik i HE Bajina Bašta na rijeci Drini, odnosno da se pokrenu pregovori sa Vladom Republike Srbije o uređenju vodoprivrednih odnosa između Bosne i Hercegovine i Republike Srbije.

Inicijativa je dobila podršku samo 40 zastupnika u PD PFBiH.

“Nevjerovatnom neozbiljnošću i neodgovornosti zastupnika poslana je poruka kako ni Federacija nije zainteresovana da naplati dug Republike Srbije po osnovu korištenja vodnih resursa BiH na rijeci Drini, te ostvari sva druga prava prema međunarodnim propisima koji regulišu međugranično korištenje voda i njihovu pravednu raspodjelu”, kazao je Kadić. Procjena je da Bosni i Hercegovini na godišnjem nivou po ovom osnovu pripada oko 20 miliona KM.

“Sramota je da se ovo pitanje aktualizira samo od strane Srbije i to u smislu razgraničenja gdje Srbija uporno tvrdi kako su objekti hidorelekrana njihovi, te u tom dijelu traži i razmjenu teritorija. Pri tome izbjegavajući pitanja naknada. Ako pitanje vlasništva hidroelektrana može biti sporno, upozorio sam zastupnike da pitanje naknada za korištenje vodnih resurursa, te naknada po osnovu obeštećenja za potopljeno zemljište i drugih naknada koji se odnose na ekološke posljedice, nije i ne može biti sporno. Srbija nam to mora platiti i za raniji i za budući period. U pitanju su stotine miliona KM”, rekao je Kadić. Stav Republike Srpske po ovom pitanju, medijski iznesen od predsjednika RS-a Milorada Dodika je kako to sve pripada Srbiji.

“To me svakako ne čudi jer brojni predstavnici naše zemlje rade u interesu susjednih zemalja, a ne svoje vlastite. S druge strane, zaprepašten sam činjenicom da ova inicijativa nije dobila podršku u PD Paralamenta FBiH, te odnosom zastupnika iz kojeg je sasvim jasno zašto nam u ovom slučaju Srbija, a u nekim drugim slučajevima Hrvatska (Buško jezero) bezbrižno otima naše resurse”, zaključio je podnosilac inicijative.

Izvor: energetika.ba